

BERNAZAR KE KUBUR TOK WALI

Rencana yang berharga ini ditulis oleh al-Ustādh ‘Abdul ‘Azīz al-Murshidī Singapura dari Tanah Suci Mekah.

Dalam suratnya kepada Qalam al-Ustādh ‘Abdul Azīz menulis: “ saya mengucapkan syukur di atas ketabahan pihak Warta – Qalam menghadapi segala peristiwa yang luar biasa itu dalam keadaan tenang dan terus-menerus mempertahankan kedudukan kalimah Allah Hiya al-‘Ulyā. . . . ”. Atas ingatannya yang baik ini, Qalam hanya dapat mengucapkan terima kasih sambil berdoa mudah-mudahan pula saudara ‘Abdul Azīz akan berjaya menampung ilmu pengetahuan yang akan dicurahkan kepada kebijakan agama, bangsa dan tanah air – P. Q.

(Oleh ‘Abdul ‘Azīz al-Murshidī)

Nazar ini adalah satu daripada amalan atau ibadah yang wajib ditunaikan oleh orang-orang yang bernazar, tetapi adakah semua nazar itu wajib dan mesti ditunaikan? Ini adalah satu soalan yang masih mengelirukan sebahagian besar daripada golongan umat Islam bangsa kita mahu pun di Malaya atau Indonesia.

Dengan makalah yang pendek dan ringkas ini sudah tentu tak dapat saya membawa bahasan-bahasan yang panjang lebar dan mengeluarkan misal-misal dalil-dalil yang lebih jauh . . . tetapi sekadar untuk memperingati segala apa yang terjadi di dalam masyarakat bangsa kita terhadap soal “bernazar” ini. Marilah kita sama meninjau agak seketika ke arah masyarakat Islam yang berada di sekeliling Nusantara kita – Malaya Indonesia – pada hari ini.

Nazar atau bernazar adalah satu amalan yang selalu dilakukan oleh masyarakat bangsa kita mahu pun daripada golongan kota yang telah maju dan bertamadun, lebih-lebih lagi di dalam masyarakat kampung, di desa-desa yang jauh terpencil di tepi-tepi hutan, di lereng-lereng bukit yang mana ajaran-ajaran Islam yang mereka terima hanya dari mulut tok-tok lebai yang sempit fahaman dalam perkara agama.

Oleh itu tidak menjadi hairan jika keadaan nazar yang mereka pandang wajib ditunaikan dan mesti disempurnakan

itu ada di antaranya yang berlawanan dan bertentangan dengan kehendak dan ajaran-ajaran Islam yang sebenarnya. Seperti bernazar membuang ancak (memberi hantu makan dengan meletakkan ayam panggang, pulut kukus, bertih, telur merah dan wang di dalam sebuah jong kecil lantas dihanyutkan ke laut atau digantung di pohon-pohon kayu yang mereka pandang kononnya berpuaka). Sewaktu mereka akan menghanyutkan ancak itu bermacam-macamlah kalimah puja-pujaan yang diucapkan oleh tok-tok pawang mereka mengucapkan ribuan syukur dan terima kasih kepada hantu puaka yang telah menghasilkan maksud-maksud nazar mereka itu. Perbuatan ini jika dibandingkan dengan keadaan kaum Majusi yang menghantarkan beraneka macam makanan kepada tok-tok pekong mereka, tentu tak begitu jauh bezanya.

Satu daripada cara bernazaar yang terang salahnya di sisi agama Islam dan selalu dilakukan oleh masyarakat bangsa kita dari semenjak beberapa zaman yang silam hingga ke hari ini ialah pergi bernazar ke makam tok keramat fulan, ke kubur tok wali anu yang termasyhur di tempat masing-masing dengan mengadakan upacara menghantar pulut kuning dan panggang ayam sambil membawa pak-pak lebai sanggup untuk membacakan bermacam-macam doa dengan qasad meminta berkat dan pertolongan dari arwah-arwah tok keramat yang di alam barzakh itu supaya

anak mereka yang baharu dilahirkan dipanjangkan umur,

hidupnya bertua dan sebagainya.

Membayar nazar dengan secara ini bukan sahaja mereka itu terjerumus ke jurang membazir yang dilarang dan ditegah oleh Allah Subḥānahu wa Ta‘ālā di dalam kitab suci al-Quran: “*Inna al-mubadhdhirīnā kānū ikhwān al-shayātīn.*” Bahwasanya orang-orang yang membazir itu adalah mereka itu bersaudara dengan syaitan-syaitan – *la ‘natullāh ‘alaih* – malahan merbahaya yang lebih besar lagi ialah meruntuhkan iman dan merosakkan iktikad terhadap Allah al-Şamad yang membawakan seseorang Islam itu tergelincir daripada landasan iktikad dan kepercayaan Islam yang sebenarnya, kerana meminta pertolongan kepada sesuatu makhluk, memohon doa selain daripada Allah Khāliq al-Makhlūqāt adalah satu perbuatan yang dilarang keras oleh Tuhan sebagaimana firmannya: “*Wa la tad‘ū min dūni Allāh mā la layanfa ‘uka wa la yaḍurruka fa in fa ‘alta fainnaka idha min al-żālimin*” ertinya: “Janganlah engkau berdoa (meminta sesuatu pertolongan) selain daripada Allah, yang tidak akan mendatangkan manfaat dan tidak pula memberi mudarat kepada engkau. Sekiranya engkau memperbuatnya, maka adalah engkau termasuk daripada golongan orang-orang yang menzalim diri sendiri.” Firman-Nya lagi: “*Wa al-ladhīna yad‘ūna min dūnihi la yastajibūna lahum bisyai‘in illa ka bāsiṭhi kafīhi ilā al-mā’ liyablugh fāhu wa mā huwa bibālighih*” – “Orang-orang yang berdoa selain daripada Allah tidak akan mendatangkan sesuatu manfaat kepada mereka malahan samalah dengan keadaan seseorang yang merenggangkan anak-anak jarinya lantas dicelupkannya ke dalam air kemudian diangkatnya ke mulut untuk diminumnya, tiadalah air itu akan sampai ke mulutnya.”

Lihatlah bagaimana halus dan balighnya ayat suci ini mengumpamakan keadaan orang-orang yang berdoa selain daripada Allah yang mana hasilnya hanya kosong dan sesia belaka seperti keadaan orang-orang yang menangguk air dengan tangan yang direnggangkan anak-anak jari mereka itu. Sungguh tertipu dan terpedaya umat-umat Islam yang terus-menerus juga melakukan perbuatan-perbuatan yang dikatakan sesia oleh

Allah Azza wa Jalla itu.

Oh barang kali ada di antara mereka yang berkata:

“Bagaimana kami tak mempercayai keramatnya makam-makam tok wali di kampung kami yang memang telah terkenal dan termasyhur mustajabnya itu, apa sahaja nazar dan apa sahaja doa yang ditujukan kepada arwah-arwah tok wali dan tok keramat yang tersebut semuanya berhasil, tak pernah kosong dan sesia.” Ya, Tuhan memang bersifat al-Rahmān, sentiasa mengabulkan tiap-tiap permintaan dari hamba-Nya, sekali pun hamba-hamba-Nya itu telah derhaka kepada-Nya. Tetapi bagi kita umat Islam, yang telah berikrar mengaku dengan lidah dan hati bahawa Allah itu tempat meminta tidak dibenarkan sekali-kali kita meminta sesuatu dan berdoa selain daripada Allah. *Wa idhā sa ’alka ‘ibādī ’annī fa innī qarīb ujību da ‘wāta al-dā’i idhā da ‘ān falyastajibū lī wal yu ’minū bī la ’allahum yarshūdūn* – telah berfirman Allah, “Apabila hamba-Ku bertanya kepadamu ya Muhammad akan hal-Ku, maka sesungguhnya Aku hampir di sisi mereka, Aku sentiasa memperkenankan doa-doa orang-orang yang meminta manakala permintaan itu ditujukan terus kepadaku, tetapi tidaklah mereka itu menurut segala perintah-perintah-Ku serta beriman kepada-Ku, mudah-mudahan mereka itu daripada orang-orang yang mendapat petunjuk.”

Di dalam ayat ini pula Allah Subhanahu wa Ta‘ālā menyatakan bahawa keadaan-Nya dengan hamba-hamba-Nya yang taat dan beriman adalah berhampiran. Dia sentiasa mendengar segala apa yang dipinta oleh hamba-hamba-Nya itu. Berdoalah dan pintalah sebarang ceruk dan tempat dengan tak payah menyediakan pulut kuning dan panggang ayam, tak perlu menyusah-susahkan diri berjalan berbatu-batu mencari kubur tok wali dan makam tok keramat, berdoalah terus kepada Allah dengan apa bahasa jua – *innahu samī‘u al-da’awāt* – “Bahwasanya Allah itu mendengar segala permintaan-permintaan dan doa” – *innahu mujību al-sa’ilīn* – “Bahawa sesungguhnya Allah itu memperkenankan tiap-tiap doa orang yang meminta kepada-Nya.”

Ya, jika pun ada di antara permintaan-permintaan yang disandarkan kepada kubur-kubur tok keramat yang diwasitahkan dengan perantaraan makam-makam tok keramat itu berhasil, diperkenankan oleh Tuhan, maka ini adalah semata-mata ujuan dan percubaan yang didatangkan oleh al-‘Azīz al-Jabbār untuk mengukur setakat mana dalamnya dan seteguh mana kuatnya iman dan iktikad seseorang hamba yang telah mengaku dengan hati dan lidahnya itu *Innallah ‘alā kulli sya’ in qadīr* – “Bahawa sesungguhnya Allah itu berkuasa di atas tiap-tiap sesuatu.”

Junjungan kita Nabi Muhammad ﷺ ‘alaihi wa sallam adalah semulia-mulia makhluk dan mendapat setinggi-tinggi darjat kemuliaan daripada sifat-sifat wali, keramat, khusyuk, tawadu’ dan ikhlas.

Semua sifat-sifat yang tinggi mulia ini terkumpul di dalam roh dan jasad baginda itu tetapi baginda tersangat takut dan merasa bimbang, jika ada di antara umat-umatnya yang di belakang hari nanti yang memuja-muja kubur-kuburnya yang menjadikan makamnya yang mulia itu sebagai sebuah berhala yang disembah dan terus dijadikan sebagai wasitah untuk berdoa dan meminta barang sesuatu kepada Allah.

Dengan sebab itu sebelum baginda wafat meninggalkan alam yang fana’ ini, baginda terlebih dahulu telah bermohon ke hadhrat Allah Subhānahu wa Ta‘ālā supaya kuburnya nanti tidak dijadikan sebagai berhala yang disembah dan dipuja oleh umat-umatnya yang jahil dan bodoh di belakang hari kelak. “*Allahumma la taj’al qabri wathna yab’ad ishtadda ghadba Allah ‘alā qawma attakhazu qubur anbiyā’ahum masājid*” – “Ya Allah ya Tuhan! Janganlah kiranya engkau jadikan kuburku sebagai satu berhala yang disembah oleh umatku, Allah sangat mereka di atas sesuatu kaum yang telah menjadikan kubur nabi-nabi mereka itu sebagai tempat-tempat menyembah” – inilah doa Rasulullah ﷺ ‘alaihi wa sallam yang diriwayatkan oleh Imam Mālik di dalam kitab “*al-Muwatṭa*”.

Dengan makalah yang serba ringkas ini eloklah kita sama-sama menginsafi akan segala kesalahan-kesalahan yang telah kita lakukan.

Harus setengah-setengah daripada kaum bangsa kita tidak menyedari kesalahan-kesalahan mereka yang sangat merbahaya dan merosakkan iman dan iktikad ini. Alam ulama yang bertanggungjawab di dalam soal ini, lebihkanlah pemandangan tuan-tuan ke arah desa dan kampung yang jauh terpencil dari masyarakat ramai yang bercorak agama yang tulen dan sejati nun di sana di sanalah tuan-tuan akan dapat menyaksikan sebahagian besar daripada kaum bangsa tuan-tuan yang telah menjadikan kubur-kubur yang mereka pandang wali dan keramat itu sebagai tempat tumpuan mengadu hal dan meminta sesuatu hajat, tempat mereka membayar nazar dan berniat – insaflah jika mahu insaf!

Sudah terbit!

Penggal 1, 2

‘Umar ibn al-Khaṭṭāb Oleh ‘Abdullāh Basmeh

Sejarah Khalifah Islam Yang Terbilang

4 penggal tamat Sepenggal \$1.20

Sila pesan kepada:

Qalam Press Limited Singapura.